

瓊山縣藝文自錄

記

新建漢兩伏波將軍廟記

康熙丁未年

馬逢皋

重飭天妃廟田鋪碑記

湖廣進士推官

洪之傑

新建約所義學碑記

分巡道

程憲

重修邱海二公祠碑記

知府

佟湘年

奉天人

重建蘇公祠記

山陰進士邑令

茹鉉

瓊臺書院碑記

分巡雷瓊道

焦映漢

陝西武功人

義倉碑記

焦映漢

海口公館碑記

焦映漢

瓊山縣志

卷三十六

藝文三目錄

重建文峯塔碑記

焦映漢

易山小記

總兵

范時捷

襄平人

江公祠記

廣東布政使陞湖北巡撫

王士俊

建文昌祠碑記

知縣

王贊

新安人

重修學宮記

王贊

學宮海棠十月放花記

王贊

重修學宮碑記

教諭

關必登

南海人

三公祠記

瓊州府同知

姚哲

湖廣黃陂人

雙泉合祀祠記

雷瓊道陞按察

黃國材

奉天人

重修靈山祠記

黃國材

重建景賢祠記

郡守陞鹽法道

賈棠

直隸政城人



蘇文忠公祠記

國朝廣東巡撫彭鵬 莆田人

邱文莊公祠記

彭鵬

重建海忠介公祠記

彭鵬

遷建瓊州府學記

國朝學政翁方綱 大興人

英佑將軍江公祠壁記

翁方綱

建萬壽宮記

番道兵劉庶

建武廟記

巡道謝樾 武進人

重修潘公河碑記

國朝巡道德明

新建瓊山雁峯社學記

國朝巡撫德保 滿州人

新建蘇泉書院記

郡伯于需 閩中人

新建普濟堂記

瓊山令楊宗秉 古絳人

瓊山縣志 卷三十六

藝文目錄

修文峯塔併重建文昌祠觀音堂茶亭記

楊宗秉

重建天寧寺記

楊宗秉

遊大悲閣登明昌塔記

蘇泉書院掌教楊纘烈 大埔人

重葺金粟庵正殿併新建禪堂記

楊纘烈

京都瓊州會館記

國朝編修吳典

雁峯社學記

同知陳景垣

重修文峯塔碑記

國朝郡守呂子班 陽湖人

重建瓊臺書院碑記

國朝巡道費丙章 仁和人

重建瓊山雁峯書院記

知縣于學質

重增瓊山雁峯書院膏火碑記

知縣蘇棨

昭忠祠記

署巡張培春

重修雁峯書院碑記

郡守林鴻年

環江書院記

雷瓊兵備黃鐘音
道進士
四川巴縣人

瓊山縣志

卷三十六

藝文全目錄

瓊山縣志卷之二十六

藝文志三 記下

記

新建漢兩伏波將軍廟記

康熙丁未年

馬逢皋

嘗聞有功德於人然後享百世之俎豆前漢邳離路侯諱博德後漢新息馬侯諱援皆有功瓊州士民歲時崇祀歷千百年不毀者皆曰非邳離遠伐新息苦戰焉得收遐荒爲一統變樸野爲文明瓊人思慕焚祀固其宜也邳離書史不多見新息之平交黎著有圖說收水陸形勢列如指掌固知其經畧山海非直技擊爲長也而銅柱兩指千古爲

瓊山縣志

卷二十六

藝文記

一

昭功德又不止在一方一世也至讀訓姪諸格言則其治兵行已以禮可知儒將流風可則可佩而據鞍示健正其不以安榮忘國事忠貞之性到底益烈家起扶風派衍天下予童而聞長而仰過扶風而拜邱墓今任海南訪廟貌奉者極多龍岐爲近隨致祭焉時有教場居民請建兩伏波公祠至其地則無片瓦隻椽僅存斷碑則係前賢戴公不忘原祠拱參將衙宇而移建大路令往來瞻仰之意也若仍建此地離居民遠恐難久存今建本衢便於護守橫書匾額英靈如在且海面風濤賴侯默平利涉至爲福於生民捍災禦患又兩侯之素

性然也罄筆難悉聞龍岐有倭寇犯境望邨三砲不響鄉人以爲有侯祐焉則此方居民焉知侯不又大有威靈顯赫造福無窮哉今地則官址也其鳩工辨材則府廳州縣暨諸紳舉貢衿僉助及贖鍰用以創建侯祠司理洪公之傑捐貲二十金督工則巡檢王如德生員某及義民某並力起工訖工月日所費金錢殿宇房屋數目俱列碑陰予以入觀不能親視全工而廟貌規模則微有可觀惟期居民永守崇奉並今文武諸公時加盼睐保護焉

重飭天妃廟田鋪碑記

洪之傑

湖廣進士推官

瓊山縣志

卷二十六

藝文記

二

瓊郡環處濱海海門一區猶郡治要津通南北而便商民者也厥地廟祀天妃歲時崇禮凡諸鼓楫颺帆乘潮而順渡者莫不肅容起敬蓋儼然海天巍柱爲神稱赫赫焉舊制置有鋪舍苗田載在舊碑歲入其稅於廟廟祀存爲香燈蠟醮品之資乃值沿革不無變更毀折無知小民輒生漁獵以致鼠雀興詞茲逢分巡海南道馬憲批清查舊制訊明勒石竊思千秋廟祀例不可磨矧屬定制則國法存焉矣制屬祀典則神聽存焉矣有制闕國法而可妄意漁獵也耶典屬神聽而可妄意漁獵也耶夫亦可撫膺生惕矣爰以原置田鋪坵段開數

逐一勘出宜存者井井備勒用垂廟祀不朽云

新建約所義學碑記

程

憲

直隸人
分巡道

月吉讀法古治也負耒橫經古學也自五品六行之教衰而門第重鄉舉里選之法廢而士習壞由是樸者不循夫親遜而黠者日趨於淫邪世家素封各分門戶以矜聲氣單寒孤族雖資性可造者力不能執經問業焉此風俗人文之所以不古也歲壬戌余恭膺

簡命巡視瓊疆瓊古荒服也不獨聲明文物不類中州卽要而城郭繕焉勿固重而學宮圯焉勿煥余不禁慨然久之乃命郡邑長吏先修舉其要者重

瓊山縣志

卷二十六

藝文記

三

者以固封疆以崇文典因思臣子服官各有專職風俗者守令之責也學校者禮所屬也余職察吏爾寧庸越俎然治之盛衰先徵民俗吏之賢能首在教化今

聖天子心切民瘼欽頒

上諭尊聖崇賢表彰實學顧乃講讀無地教育無術其何以一道同風仰副

宸衷哉是不得不表率各屬亟與郡守謀經始幸郡守素有同志因共思捐俸落成之郡守又請於余曰海外科名晨星落落學者之過歟抑教者之不得其術耶今欲於約所之後再建學舍延文望者造

就單寒且兼請命名以垂永久余曰此曠古盛舉而更深慰余願者也第考之前代自郡邑兩庠外別無學之可名惟經奏請者始得置書院然非紫陽白鹿西山建陽陽明諸大儒不敢教授生徒也舍此而外惟新安朱子增設社學刺史洪洙有古小學之議大司農倪公鴻寶有社學講堂之條然皆令博士弟子員各相勸勉已爾若地方有司而延師置館洵振古盛事也余聞耿壽昌有義倉之奏勸富民歲輸粟以備賑范文正公有義田之舉歲以所收給耕讀今郡守不惜金錢倡立學館且歲給米薪脩資以鼓勵單寒此真一時義舉也卽

名之爲義學亦何不可然余猶有說焉義學之建固爲寒士生色乃一郡人文未得借觀其何以振興文教余意更欲每月於朔望講約外就斯堂定期會課自予暨守令以下終而復始各捐金授餐且甲乙之以表優等則一舉而尊

朝廷法古制賢愚不肖旣讀法而凜王章更居稽以敦實學士習民風行見化行俗美紹休於文莊忠介二公時矣郡守欣然應命曰此誠瓊郡之千載一時也爰卜日鳩工是役也肇於丙寅夏孟竣於夏仲計大門三間講廳三間中堂房三間後書舍五間左右書舍三間廚房一間前後明堂蔬圃方

廣如焉卜構於城南之直街俾四方便於聽聞也約所之建余與郡守共捐之義學之立延師而教授之郡守之力居多余不沒人之善也郡守爲誰佟湘年也始終其役而月旦課藝者舊瓊山令茹鉉也瓊州總鎮左都督吳公謂余曰如此盛舉洵千載一時予雖武臣方至豈公等獨爲君子乎閩白嶼山襄陽非異人任值茲鼓勵人才敢不勉力共襄盛舉爰是水師副總兵李左營尹右營周皆歲值一月而各營衛都守及學博咸與焉余不禁喜而不寐曰天下有如一舉而文武同心數善咸備者乎此誠千載一時不可不記之記之者非

瓊山縣志

卷二十六

藝文記

五

邀名也慮珠崖大荒文教式微且歲有颶風修葺維艱既難經始復難善後是不得不望後賢之宦歷瓊疆者而增美廣大之以垂於永久則余願始慰爾故記之

重修邱海二公祠碑記

佟湘年

奉天人知府

古仕宦者多矣古名臣亦不一然或望重省郡而不能徧及朝野榮於生時而不能傳諸沒世雖其間亦有遭逢之不偶乎要亦其生平學業居官治略未必真可傳世而起人服教畏神之思爾若邱海二公則不然二公者皆瓊人也思文莊公自翰苑歷東閣三十餘載史稱其正笏立朝有曲江風

度晚進行義補一書雖推廣於西山然萬世治平之道莫踰此矣忠介公由邑令至開府大法小廉聲望等於孝肅迄今誦御史受杖一言其風裁抑何凜凜耶是二公者余敬之慕之匪伊朝夕矣歲辛酉余出守瓊州雖慮珠崖荒域甚於長沙然私幸備官二公故里猶得仰高山而讀治譜抵任後卽延訪後裔購遺書恨世遠年湮多闕畧勿全乃取二公文集命瓊山茹令校輯而補梓之至若邱公後嗣雖有蔭階與明經弟子員亦未免慨同王謝海公後人僅一孝廉而物故一綫不絕者僅如叔敖耳兩賢祠宇薜蘿於荒煙蔓草余每從享祀之日未嘗不登堂而愀然以傷也雖欲修舉適興作未遑歷丙寅夏仲而郡內之城郭泮宮約亭義學始次第告成爰請命於我上臺程公公曰經術如邱公經濟如海公此天地間生而與日月爭光者也余仰之久矣崇尚先賢我等分內事也卽晤總鎮吳公同瞻拜兩祠共捐貲修繕廼邱公一祠雖塵封月漏猶堪整葺若海公一祠則傾風圯雨不可復問因訪忠介公故居卽鄰邱祠惜也子孫式微轉鬻他姓余如價贖之爰卜日而兩役並興其間應新應仍應補應築應翦伐應粉飾應平治應增廣庶幾曲盡告竣日如禮隨道鎮文武而與

祭焉因各擇兩公後嗣專守之道鎮二公曰是舉也匪獨遂景仰之私實快復海公之業余曰敬慕有年不意於萬里外親拜音容則此舉寧敢邀先賢之勿吐亦只告無罪於維城二公雖生不同時乃異世比鄰倘得起九京以下朝夕談心亦一快事且更使千秋百世後世敬公之經術或敬公之經濟其裨我後人之立朝居官者不淺豈曰服教畏神修舉一時而已哉蓋亦後賢之所當世世典型者爰記之以永將來

重建蘇公祠記

山陰進士 茹鉉

昔人云山川之奇能開人之性情而供其筆墨文

瓊山縣志

卷二十六

藝文記

七

人之奇能發山川之靈秀而留其名勝杜之夔州李之夜即韓之潮陽秦之三巴坡公之海外皆遠歷山川而其文益奇也山之蘭亭園之金谷亭之放鶴堂之屏山洲之鸚鵡石之雪浪泉之浮粟皆文人選勝而其名始著也余好遊塵跡幾徧每遇先賢故里或騷人題咏或山川奇爽未嘗不感慨係之殺青而記於郵筒甲寅余選授瓊令瓊古珠崖地也讀賈捐之請棄一疏私念如屬國烏孫不愜人意及讀坡公外集與玉蟾軼事又未嘗不私念瑤宮瑤圃名可聞而不可至今邑以瓊名豈果荒域流沙一無可登眺者受事後即詢步坡公遺

跡低徊久之惟一泉如釜上有樓三楹兩星勿蔽
矣房一菴頭陀如槁木禿石與語不解里民曉正
音者曰學士安置儋州耳此特其行遊地也時余
卽題一絕句爲僧人作乞食因緣後適以他事至
儋耳訪坡公別業所謂載酒堂與枕柳園悉荆榛
勿翦乃作鷓鴣天一調寄慨歷丙寅文武各上官
致祭文莊忠介二公余得與焉適邱公祠東位端
明蘇公道臺程公曰何以邱公祠而並祭蘇公也
明經邱維昌曰以向經題請得配祀故爾程公曰
正配宜遵典禮歷代來自四配後凡理學明儒經
濟名臣得配食者必於正祭有專祠茲旣云配宜

瓊山縣志

卷二十六

藝文記

八

於蘇公主祭而邱公配之未聞以邱公家廟而位
置端明也余聞浮粟一泉向經蘇公命名且時爲
行遊者應於此地另建專祠庶不失禮特土木費
繁猝難經營耳郡刺史佟公欣然應命曰崇祀先
賢表彰名勝此守令職也恐縣官因公苦父老守
願獨任之乃聯騎偕往共相區畫佟公卽相土度
工易樓以堂者慮海國風雨飄搖也覆泉以亭者
泉以公重也增置書舍廊房者爲仕宦從祀地也
泉之外鑿池而植以芙蓉者以儋誌蘇公載酒堂
前素植蓮而以此享公也至若一泉爾或呼金粟
或呼一粟或呼一勺或呼浮粟殊無定名余於暇

日相彼流泉見源突浮沙漾細石如白黍公之名
浮粟也殆義取諸此歟抑或視浮生其若寄渺太
倉於一粟寄意於言外耶余因程公正祀典之非
而并定泉名恐後人之訛以傳訛也是舉也不獨
表先賢之勝蹟而實昭崇祀之知禮且俾端明得
慰其舊遊而文莊亦安於九泉落成之日佟公親
行致祭會文武各屬設宴斯堂程公曰坡公文章
於海外益竒浮粟一泉得坡公益著今郡守毅然
獨舉則余與爾亦藉以不愧先賢矣總鎮吳公謂
余曰如此曠典不可不記以垂不朽余唯唯曰昔
波公之渡海而南也已六十有三矣當其困頓珠
崖以春夢婆爲知己雖屢念故鄉而不可得又安
知千秋百世後有如斯之人以地傳地以人重高
山仰止而修明祀典哉余年亦六十有三矣視坡
公直如太華爾敢揚管以傳勝事聊紀實以望將
來

瓊山縣志

卷二十六

藝文記

九

瓊臺書院碑記

分巡雷
瓊道焦映漢

陝西武
功人

大海之極南煙波萬頃中涵竒甸而巨靈伸臂五
指矗兀如小崑崙其扶輿磅礴之氣與海光相映
鍾秀於人英賢輩出蘇子瞻稱衣冠禮樂班班蓋
自宋而已然至於明而極盛北方之學莫能或先
若邱瓊山海忠介之文章氣節尤其較著迨其後

而少衰矣今

聖天子崇學右文

御製訓飭士子文勒之學官諄諄誠勉聖道與王化並
驅薄海內外罔不雲蒸霞蔚瓊之科名業已鵲起
而提南宮者猶遲遲有待得非學出多門人人言
殊而教無專師作輟相半乎每念文教之興在士
子固宜爭自振拔而羅而致之涵而濡之激勵而
裁成之則在留心學校者出大力而興起靡靡也
鵝湖白鹿朱陸講學其間一時雍雍濟濟如勉齋
仲默世昌之徒皆廣其師說以昌明聖學後人不
能望其肩背近世如茅鹿門分守天雄設書院以

瓊山縣志

卷二十六

藝文記

十

造士四方之士宗之其成就而上者躋巍科著偉
業名公巨卿指不勝屈次亦多所建白以自鳴於
時夫非成效之可據者耶余自維陋劣抱愧前賢
而勤宣德教扶植士氣之思未嘗一日忘爰於署
之西丁字街得地廣若干丈袤若干丈面執程功
謀由獨斷前爲課廳中爲講堂左右翼以長廊俱
五楹又其前爲大門大門之外建石坊顏曰瓊臺
書院誌其地也是役也雖無文甃雕甍輝煌金碧
而宏敞完固軒豁生明一切土木瓦礫工役之需
約費六百餘金捐之薄俸不假助援復置義田若
千畝以供廩餼延名宿爲師聚闔郡生童講貫其

中月有課日有程諸生有艱於自給者或省試無力者亦得仰資歲租以繼其不逮而總以瓊山令經理其事於是乎學無他歧教歸一轍乃進諸生而告之曰毋口耳從事而精誠是輪毋純盜虛聲而敦篤是務毋入見悅而出見亦悅爾朝於斯夕於斯敬業樂羣而激昂奮發將淬礪之餘光鋌立見如錐處囊如劘發刃黼黻休明潤色鴻業無負海山之靈而文章氣節與邱海其人輝映後先余即不敢邀功而嘗婆心引盼於是是亦與有榮幸矣用礪石以爲多士規

義倉碑記

焦映漢

瓊山縣志

卷二十六

藝文記

十一

瓊州爲左粵支郡環海而處三面俱大洋極東南爲占城爲暹羅西爲交趾沙無內地可通惟北與雷對峙距以八十里海面舟楫往來風浪云阻非若廣韶諸郡疆連壤接可以豐歉相資而通糴四鄰者也濱海之地多斥鹵沖於水壓於山浮沙而土膏不沃民不力穡而望有秋難矣又四方之人雜遝輻輳耕之家一坐而食之者百故雖一歲再熟而合瓊之粟不足食瓊之人而旱潦可知夫瓊所仰給者獨有雷耳假雷與瓊交饑雷尙可仰食於高肇而瓊必至坐困不思所以善其後徒支吾目前爲不終月之計毋怪乎民不聊生也余承乏

二郡觀察下車以來鰓鰓以是爲慮戊子己丑瓊
告饑余詳請督撫告糴雷郡得穀數十萬石所
活無算然每詳請上下文移動淹時日而民不卽
沾實惠者以此故與其補苴於事後毋寧預策於
將來爰與郡太守謀所以積貯而凶荒有備用捐
俸數百金置舊公館一所而置倉廩焉倉在縣學
明倫堂後東周巷內地勢爽塏旣無卑溼易蠹之
患左右空曠又無回祿卒變之憂位置旣得量材
瓦料俱新不費興築不役工匠不勞監督不需時
日仍厥垣宇而繕葺之堅好完固可容粟數百萬
斛乃捐穀若干石爲久遠計饑則借給熟則輸還

瓊山縣志

卷二十六

藝文記

十一

管理官吏無侵無漁若紳衿士民之有力者願積
穀備荒亦得借貯其中而平價以糴聽其自便總
期有備無患不事告糴維艱民沾實惠而已抑有
說焉瓊民家少蓄積一有凶荒商販往往闌出以
媒利不兩十日價立騰起甚或藏匿閉糴惶惑貧
民而賈獲三倍且州縣穀價恆視府爲低昂府方
視騰縣卽暮湧今賤歛貴散而出入平衡盈縮有
法未荒而備將荒而計旣荒而救庶商無所售其
奸而民恃以無恐乎朱子曰救荒之說上則感召
天和以致豐穰儲蓄次之余不德不敢自謂足以
邀天眷而積穀備荒區區愛民至意則固籌之熟

矣聊紀以示來者

海口公館碑記

焦映漢

海口當南北之衝冠蓋仕宦之往來必於是焉駐節蓋此地與海安相望而隔以八十里海面巨浪稽天將渡而往者潮候不能不須之時日其來者舍舟登岸尤急謀宴息者也先是公館在北門外天妃廟西湫隘卑陋不足以容車馬又風雨摧敗其行裝不無暴露燥濕之虞用謀更置於南門城內得地表若干丈廣若干丈取材於海北伐石於山南昇土於邱需甃於陶付鐵於冶鳩工於肆運徙轉動於市於是前爲客庭後爲公寢左右翼以

瓊山縣志

卷二十六

藝文記

十三

兩廂俱各三楹大門附以側舍爲七楹由大門而左北向爲儀門又其左爲官廳其後爲茶房爲庖御合諸別室以門面計者八以楹計者三十是役也經始於戊子春初落成於今秋七月約計工費六百有奇而民不與知自鎮府廳以及十三州縣莫不踴躍從事余實倡其始也其舊館亦變價附用而屬瓊山令王君董其事創造務謀其可久不侈炫爛之觀茲雖宏敞壯麗而崇基墉施黝堊而外毋靡毋渝堅好是輸所幸入斯館者不訾雕甍丹楹之不飾而喜規模之畧備試嘗按部而稽車馬有所人役有次行李有處厨饌有具讌會有歡

寢處有適一切上下措置井井有律庶幾送往迎來而賓至如歸乎若夫隨時修葺毋滋敗壞是繼起者經久而不敝之良也是深望於後之君子也
重建文峯塔碑記
焦映漢

文峯在瓊邑丁村之東南村曷以丁名謂其地處郡城丁方故名曰丁火行也較丙特秀主一郡文明象附近有玉筍奇峯峭拔嶙峋特峙神剗鬼斲大不類人間刀斧痕隱隱與郡庠照映先是有石塔簪之如立筆狀明以前海南科第特盛理學名賢互相炳蔚雖曰人傑亦地靈也歲久塔就圯陵蕩不復科第漸歎寥落是此峯實關一郡人文石

瓊山縣志

卷二十六

藝文記

十四

塔興廢尤有係焉康熙甲申郡守賈棠欲挽其頽輒試之標魏杆於塔址一柱孤擎直插碧落越明年鄉試郡中獲舉者果得六人

國朝以來所未曾有噫信矣余忝監司深念瓊州文運凋敝力圖振復至是而後乃慨然曰有是哉興廢之關乎盛衰也特重建名塔費工費鉅非一緡數金一手足力可辦奈何爰謀之賈守毅然仔肩共割俸金以倡自郡丞暨諸牧令若紳衿輩亦無不襄捐資文邑雲志高尤踴躍捐二百金助工知縣王贄慨然爲董其成丙戌三月訪落經營庀磚石一時繩引刀削以及壘結運徙奔走之徒般般

闐闐如市斯闕不日告成郡下羣推首事於余請
記始末余因念浮圖七級緇流藉起宗風雁塔十
尋學士庸題姓氏形勝固自天成而補偏救壞端
資人事今必謂一郡人文盡乞靈於一指頑峯似
非有志所樂聞然木杵小試輒效於前將石塔高
標自徵於後工且成矣異時海南文運大起科名
烏奕嗣徽勝代卽不問其推原所自與否而余等
嘗備官斯土耳而目之不但藉以額喜也哉故援
筆記之

易山小記

總兵 襄平人 范時捷

署之東偏偶然堂之前向有石山高丈餘周數十

瓊山縣志

卷二十六

藝文記

十五

武頑然不靈堆峙院內草樹叢雜刺眼逼面絕無
曠遠之致日夕坐對間如積陰不陽鬱鬱當我懷
抱去之惟恐其遲也予於癸未歲四月由韶移瓊
會海警未靖日孜孜於調度甲申夏勦撫既定及
冬又有沿邊巡勘之役皆躡躅而未遑今春仲始
召工匠而平之易以短垣護以迴廊蒔竹數竿蕉
數本冷綠映人生趣勃勃砌下種秀石數卷磊落
不羈時有雲氣一縷摩盪其上空青南來紫翠東
至仰觀俯察境換目遷其得乎曠遠之致乎先是
有或人告曰是山爲形家所忌亟去之便又有或
來告曰是山荆始經營幾費工力一旦平之似不

經予笑而答之獨不觀予之堂額乎天下事無在
而非偶然耳前此成之偶然也必有謂也予不得
而知也今此平之亦偶然也非無謂也予固可得
而言也予之性在曠不卑卑於戶牖在遠不局局
於跬步在天成不沾沾於人力山川之樂得之自
然者真得之雕琢者假人之性得之超豁者澹而
可久得之窒隘者其風期必不俊邁予蓋有所取
爾工力云乎哉形家云乎哉或唯唯而退既而竊
嘆曰予謬膺一鎮且在海外一以安靜以享

聖天子太平無事之福退食之暇手一編以佐政治所
未逮倦則尋此君高致想見王徽之咏嘯文與可
瓊山縣志卷二十六
藝文記 六
墨瀋又或含睇蕉石如對懷素揮灑南宮袍笏亦
足以收海濶天空之概予性其爾爾耶若夫後之
視今猶今之視昔是我非我或山或池俱非予之
所得而問也爰叙數語伐石而記之

江公祠記

廣東布政使
陞湖北巡撫 王士俊

古聖王之制祀典也法施於民則祀之以死勤事
則祀之以勞定國則祀之能禦大災則祀之能捍
大患則祀之矧恭逢

聖天子御宇河嶽懷柔百靈効順凡江海諸神應請封
爵者悉令入告崇德報功之典皇哉盛矣 士俊於
雍正四年署瓊州府事至徐聞縣海安所因得瞻

拜江公祠江公者前海安水師副將諱起龍者也
士俊詳考公之遺蹟既悉合古聖人祀典而復深
符

今聖人之

寵命此大義攸關

聖恩所及爲臣子者怵然動念豈獨爲行人利涉之私
乎公係江南歙縣人順治十三年任白鶴寨水師
參將駐劄通明港港係雷州左臂村墟荒落公心
憂焉乃捐俸錢置什器集流民一時商賈輻輳聲
勢與郡城埒所謂法施於民者公其有焉時海氛
未靖公督弁兵剿捕屢立戰功及晉副總兵官值

瓊山縣志

卷三十六

藝文記

十七

遷流之後兵亟宜部署民亟宜安集公擘畫周詳
調劑妥貼所謂以勞定國者公其有焉康熙五年
因海口游鯨飄突公擐甲登舟晝夜遊奕颶風陡
發公殞於海滾滾洪波未收遺骨所謂以死勤事
者公其有焉公之殞後數載精靈恍惚雲駟
穹龜長漁洋舶巨艦呼籲立應危者以安險者以
濟歷今六十餘年久而愈赫所謂能禦大災能捍
大患者公其有焉嗚呼公生而爲英死而爲靈稽
之禮樂疏驗之於春秋外傳質之於國家令甲膺
封號而歆血食誠不容一日姑缺也已乃從前守
土大吏僅以文卷散佚恐格部議未請於朝雖公

之神坦然無與而渡海千萬人之公願卹卹乎恫
焉士俊所以矢志盟心於昔年而瀝誠陳請於今
日者也伏荷

聖天子洪恩曠典於雍正九年春

欽定英佑驍騎將軍之神命下之日無不感慶然則公
之生死豈偶然哉昔蘇文忠記韓廟云其生也有
自來其逝也有所爲故申呂自嶽降傳說爲列星
若公者稟天地之正氣鎮萬里之海疆豈非不依
形而立不恃力而行不待生而存不隨死而亡窮
塵厯劫浩然而長留者乎昔昌黎以文德顯於潮
今公以武功顯於雷瓊潮郡之人水旱疾疫必禱
瓊山縣志

卷二十六

藝文記

十六

於韓而四方之人乘風涉浪有不禱於公歟然則
公與昌黎固分峙乎粵之東西郡已今值我國家
湛恩汪濊覃及海隅

皇上鄭重祀典士俊因得以上陳

黼座自今以往知公益感

天家之寵賜鑒下土之精誠祥飗甘雨海不揚波永誌

清晏之床也士俊於公

勅封抵粵之後奉

命巡撫湖北不獲再謁公廟因捐俸銀三百兩修葺海

安海口祠宇并礮石記其事以奉揚

天子休命時雍正九年辛亥仲冬月

建文昌祠碑記

王 贊 新安人 知縣

客有精堪輿之術者謂文峯塔簪於高岡恠石之上峻崢拔天狀如筆立且位居於丁與學宮隱映主闔郡文明之象余既董其事落成矣乃復請於其前建文昌祠以配之文昌於祀典無所考按天文斗魁戴匡六星曰文昌宮夫文昌一星耳乃天下儼然肖像爲縞衣素鳥青童白馬而徧祀於學宮相傳文昌主天下之科名今瓊之學宮既闕其祠而祠於他所又不得地神未必據我若地與神宜上據其勢下接以神文光相映文昌與文峯方將相倚爲靈助文明而興多士未可知也爰鳩工

瓊山縣志

卷二十六

藝文記

十九

庀材得地袤若干丈廣若干丈正殿建以三楹毋靡毋渝制不甚高而爽塏虛白崇以基墉飾以黝堊左右翼以兩廊亦各三楹側供庖御前券大門門以內築屏爲障而外砌以石垣又其外左側建茶亭數椽以濟行人一切土木瓦礫工役之需約費二百餘金捐之薄俸未動民間一錢一物是役也雖無雕甍文甍以壯觀瞻而規模畧備稱郡南巨觀焉仍買田若干畝歲收其租以資肝蠶延衎子本資并其徒日食之費亦久遠計也工既竣偕邑多士成釋奠禮行其庭其靈若來登其堂其神如在已乃陟文峯一二級如身立雲表遠望陶公

西石諸山若隱若顯近延明昌雁塔若拱若揖城閣參差於前峭壁嶄躡於側俯瞰長川飛遶小橋亂石搏之噌吰突怒聲如洪鐘蓋極俛仰物類之奇莫不合形取勢以效伎於神神其長有此土而盡出其精英法力啟多士之聰而兆科名之盛乎用鑱石以紀歲月

重修學宮記

王贊

瓊稱珠崖自漢已列職方而學校之設則自有宋始明初因宋元舊址而加飾焉緣瓊多颶風往往走巖石而墮堅城當之無弗敗者又木多生蠹棟樑蠹而屋宇頽故學宮每旋飭旋圯修建多不勝

瓊山縣志

卷二十六

藝文記

二十

書然或令長詘于費而艱于材嘗有閱歲年而不飭者矣余于甲申季冬受事瓊邑首謁文廟而殿廡頽敗齋舍榛蕪壁水橋門夸如平楚至于拜瞻無地登降無憑不禁低徊嘆喟而不能去每當春秋有事於先聖之廟顧寮屬師生憬然嘆曰瓊之學者啟于宋而盛于明况號稱邦鄒魯矣而學宮蕩然不治不亦重褻宣聖之神靈以貽學者之羞余忝司牧其何以臨吏民而處其上乎用是皇皇然爲籌度經費謀復舊制以詢于薦紳多咸謂非五百金不可越明年乃奉有重修之檄于是上有各憲下及學博紳衿俊秀舉欣然樂助以

襄厥成而余則匡諸不逮爰詹吉而經營之肇始
于丙戌之春落成于丁亥之秋堂廡規制頓還舊
觀而余向之嚄喑不能一刻安之心庶幾稍慊焉
然廟貌雖肅而祭器不備亦何以修春秋之常秩
而昭祀典乎憶昔先君子嘗適魯觀廟堂禮器一
切祭品位次著有纂輯祀典一書因修學之設并
付剞劂將自木豆竹籩以及範銅諸器悉倣古式
次第爲之藏之學宮俾春秋有事之日而陳列焉
以遂先人四十餘年未竟之志實余之心也夫瓊
之人士既具有鄒魯之風矣余又觀鄒魯之禮器
奉尊執觶以趨蹌登降於先師之殿庭知必有

瓊山縣志

卷二十六

藝文記

三十一

樂觀其盛感發而奮興者余且拭目俟之是爲記
學宮海棠十月放花記

王贊

瓊之學宮明倫堂有海棠一本予初不識爲海棠
也海棠原海外異種嬌豔綽約以色媚而無香惟
蜀之昌州海棠香氣特絕然亦未聞盤龍峒曲雲
蓋青葱若瓊山者其樹成抱其枝堅凝其葉美滿
其色冰素其氣清芬撲鼻酷似昌州而花期以春
夏之交爲率假此美質而產於通都大邑四序之
調勻灌溉之優渥騷人墨客之品題其精英發越
當必有加乃雜遯於凡卉樗櫟中幾不能以自見
豈不惜哉蓋因學宮鞠爲茂草三十餘年

先聖先賢無妥侑之地而此花散植紛披闐然無色與
廟貌同一悲風泣雨而已今秋八月修葺落成廟
貌儼翼百廢俱舉於是乎俯仰輝煌物靈效伎海
棠忽以十月放花欣欣自喜彷彿月下之美人依
稀睡足之妃子是豈屈之者久伸之者速不資常
格而發揚特異也耶都人士以爲瑞也相與歌詩
倡和爭妍鬪靡羣推美爲修學之功或牽引於政
迹之異夫昔之人有異政每於物類徵祥若蓮之
並蒂禾之雙穗麥之兩歧往往而有然予待罪瓊
土毫無善政曾何足以當之且海棠亦非其比也
若以學宮丹雘而海棠冬放故假此花以表靈異

瓊山縣志

卷二十六

藝文記

三

聖人亦不若是之幻也夫物則亦有偶逢其會者
矣瓊南花木爪實先時後時多與中州不類而就
瓊之氣候合瓊之見聞從未有海棠冬放之奇而
又適放於明倫堂之前適放於修學宮之後故吾
謂海棠之先春放花未足爲瑞而學宮自瑞而明
倫堂自瑞而學宮之後明倫堂之前之海棠先春
放花自瑞也且瓊之多士能以此爲瑞而講求於
明倫之義無負宮牆以內之人因奮發激揚一如
海棠之先春放花乃真瑞也吾聞廣陵芍藥開金
帶圍而兆八相又潮之韓文公廟有韓樹相傳昌
黎手植遇一吐花則士戰南宮多捷瓊不登進士

歷顯宦者數十年矣因地靈而人文蔚起意者其
朕於此乎

重修學宮碑記

關必登

南海人
教諭

瓊山爲一郡之首聲明文物甲於諸邑有明一代
如邱文莊海忠介諸君子文章氣節炳炳烺烺彰
於史冊稱極盛矣我朝開國以來以僻處遐陬
風氣稍遠極力振興尙屬有待瓊庠在府治之南
說者謂地脉自五峯發源蜿蜒而來浮沉數百里
而萃聚於此實擅瓊南一郡之秀理信有之奈海
風多惡宮牆日就圯毀向尹斯邑者以修葺之舉
貲費浩繁三十餘年頽敗相因最後北新安王

瓊山縣志

卷二十六

藝文記

三

公以甲申臘月來宰是邑始議所以興復之公諱
贇字獻甫戊午舉人種學績文而尤工於詩益大
雅君子也爲政知所後先甫下車慨然以舉廢興
墜爲己任遂集諸生設法捐修罷心廢精不遺餘
力經始於丙戌落成於丁亥聖宮規模煥然一新
矣工旣竣首辨諸賢諸儒先後坐次向攬越無倫
得公釐正而定次復造祭器向俎豆淪亡古制莫
考公鳩工製造使器有常數實有常品復覩先王
法物焉名宦鄉賢二祠舊址在學宮之外今創置
於吉門左右庶有當古人褒德尙賢至意且學宮
兩旁原有學舍數十間餘地數百丈載在縣乘乃

頽廢之後入於兵民者殆盡公一一爲清理將考古祠敬箴亭次第舉行益自廟貌儼翼廊壁輝煌以迄盡物盡制百廢具舉不啻剏造伊始之艱鉅而非尋常修葺之可比也嗚呼三代而下牧民者催科而外罔有先圖間有事於學校亦文其名爲考績之階耳公之太翁五修先生積學累行留心祀典著有考畧一書公服古入官一承先志付梓行世不特潔己愛民冰蘖自矢而敦行學校惟日孜孜約計修學之費不下六百有餘由上官以紳士雖各有捐貲不滿十之二三則公之罷心廢精不遺餘力豈顧問哉因之有感於盛衰之故矣地

瓊山縣志

卷二十六

藝文記

十四

脉有衰有旺而殿宇內因之而文運因之旺極而衰衰極則當復旺茲之氣象維新物靈效伎正秀脉六十年還元之會而公適扶運而幹旋之者也又以每月兩次集多士課勤帙括獎拔奇尤社名棠花取學宮海棠十月放花之意地靈人傑其與邱海二公後先輝映乎我公作人之盛爲不可沒也諸生請書其事於石求予爲誌其概云

三公祠記

瓊州府同知 姚 哲 湖廣黃陂人

瓊郡爲南溟絕島處禹貢荒服外自漢始內屬雖曰禮樂班班然而因仍舊陋文行之士代不多見宋紹聖中詹山大蘇稟負天涵海之才持挺直不

回之節言事不當旨以別駕安置儋耳至則僦舍不容買地築居其摧窘誠有不堪者而先生固自若惟以詩酒爲事寄忠愛於江泉田畝間時得子雲昆季暨唐佐輩日從遊而子雲兄弟尤執禮特謹嗚呼此豈非先生之文之行有以感之而然哉自是郡下人文崛起先後相望其尤傑則有若明邱公濬擅才名所著甚夥有裨世用如大學衍義補諸編久已傳誦最後則海公瑞嚴正不阿剛直敢言事薄海內外里巷中婦人孺子無不知剛峯者猗歟何聲之烈歟論者謂由蘇公有以倡之於前二公斯有以奮之於後然向使不有二公以奮

瓊山縣志

卷二十六

藝文記

二十五

之卽倡之者亦覺過化之無憑也官此土者以故胥尸俎之第舊非合祀一所又遷變靡定康熙歲辛巳撫軍彭公按黎情至郡見諸祠率多圯壞命雷瓊分臬使者三韓黃公國材重新之黃公下之郡郡太守故城賈公棠與余謀謂蘇邱海三公後先一揆曷並祠祀之遂相與籌經費審方位得城外西北隅海公祠舊址又拓其隙地自分臬以迄守丞牧令各捐俸金尅日飭材僦工以瓊山丞蔣永裕尉鄭健偕倉大使方爾諫董其役經始于癸未之春王訖工於甲申之嘉平三祠面北平列設木主分中左右祠各門外繚以垣而鞏其闕扁歲

致丁祭一時邦人咸樂觀厥成嗚呼士生斯世其卓然不朽者獨文與行耳東坡之念存君國文莊之闡明經義忠介之亮節清風是三公者雖生不同世產不同地遇合不同遭而方同道合不得以流寓鄉賢分之固一而三三而一者也並列而祀以誌夫瓊郡文行所自昉與後此繩繩繼繼之媿使海外人士率爾逖聽咸知士習所重舍此文行而外別無自立之端日益奮發又何多讓焉是爲記

雙泉合祀祠記

雷瓊道陞按察使

黃國材奉天

余以壬午歲由漢陽守奉

天子簡命兵備瓊南至海口登舟見夫水天一色波濤

瓊山縣志

卷二十六

藝文記

二十六

不興乘風揚帆逾時而渡受事甫浹旬訪郡邑名勝得雙泉祠於城東門外蓋郡人建以祀二蘇先生暨前明太守武林翁公者也夫二蘇文章氣節當時重之後世傳之矧坡公久謫儋耳潁濱亦安置合州宜乎瓊之人士興慕而尸祝之矣至瓊僻處遐荒唐宋以來皆爲遷客流寓之所居迨設立郡邑涖茲土者代不一官官不一人政事才名豈乏表見而獨配之以翁公也其故何哉稽厥志傳乃知翁公之植德於瓊人者至深且厚而瓊人之致感於翁公者尤真而摯一切載之郡乘勒之貞珉茲不具詳第雙泉之名則因蘇公鑿之於前翁

公濬之於後瓊之人士聞蘇公之風佩翁公之德
乃合穎濱而三之也職是故耳嗟乎自宋及明取
科第歷卿相赫濯顯榮纍纍若若曾日月之幾何
灰飛煙滅寂寞無聞者何可勝道二蘇官不稱才
翁公位終郡守且世之相去也數百餘歲地之相
去也數千餘里而遐方之外島夷之氓慕義頌德
歷久彌新且欲借一勺之泉以虔蒸嘗於弗替豈
非人之所重者在於名節而不徒恃乎區區祿位
也哉抑余又聞之貪泉之傳也以吳隱之廉泉之
名也以范柏年釀泉之著也以歐陽永叔此雙泉
也蘇公翁公亦偶然疏之濬之遂使後先繼美傳

瓊山縣志

卷二十六

藝文記

二十七

爲韻事而至以名其祠是三先生不以雙泉重而
雙泉則藉此以不朽矣越一年癸未翁公文孫嵩
年以名進士督學來粵公明之譽洋溢江海而余
謬膺薦牘

特旨陞見復蒙

聖恩授粵之觀察案牘焚如夙夜黽勉期以景型前哲
故兩人道義相規頗稱莫逆尤熟悉其世德郡之
人以祠宇漸傾庀材而新之董其成者太守賈棠
臨高令樊庶而余會有事茲土也故爲之記

重修靈山祠記

黃國材

六祝六祈之制詳於周禮古稱粢盛豐潔嘉粟旨

酒馨香於神明以祈三時不害而民和年豐者皆所以爲民也故凡郡邑祠宇能捍災禦患有裨民社者禮應隆其廟貌肅其壇壝用啟民敬而迓神庥亦膺民社之寄者所不可忽也瓊郡有靈山祠舊祀六神自宋迄今靈爽赫濯明洪武初守臣入告詔登祀典由來尙矣瓊之民以旱潦疾疫禱者踵接祠下而神之昭應抑若於瓊民利病痼瘵欣戚不隔者蓋神之靈誠足以捍蓄禦患佑我烝民乎其如祠宇歲久頽敗已甚余分巡至瓊祇謁之日目覩榱棟傾欹丹堊脫裂方欲鳩工加葺會攝臬司篆旋叨卓薦復提刑全粵鞅掌不遑此心切

瓊山縣志

卷二十六

藝文記

二十六

切未嘗以身遠遂弛風志乙酉春觀察焦公蒞瓊圖葺之念倍切于余總鎮范公雅有同心爰謀之郡守賈君與諸牧令協力贊襄經始於是歲仲秋落成於季冬傾者以立欹者以樹朽株蠹蝕悉爲更置堂宇維新門垣重構於以邀福於神奠我黎庶將見瓊之士民焚香執葦踵接祠下者咸慶年豐而荷神庥歟因郡守賈君之請爰書數言以識重建景賢祠記

郡守陸鹽法道

賈

棠

直隸故城人

瓊郡北郭舊有景賢一祠祀宋蘇文忠公軾明邱文莊公濬春秋致祭歲久傾圯康熙癸未中丞彭公命建兩公專祠景賢遂廢丙戌歲余續修郡志

見崖州向有景賢一祠祀唐太尉李公德裕宋宰相趙公鼎宋學士胡公銓續後改爲五賢祠夫任公伯雨李公光李公綱其賢同其被斥逐同以安置昌化萬安軍獨不得與用是怒然此崖州一祠乃就崖論賢耳余維同是人也在當時或以不賢見棄或以賢著名彼亦不自知爲賢不賢迄今尙論古人莫不以賢稱之則其人生平爲何如耶諸公忠義文章昭垂天壤時遇雖有異同節概有如一轍瓊處遐荒絕島得此數賢後先輝映其過化存神之妙足以風勵有位儀型邦國抑何幸歟余既不忍舊祠遽廢泯沒創置初心又不忍先賢志

瓊山縣志

卷二十六

藝文記

二十九

同道合祠祀獨有遺缺爰捐薄俸復建祠宇於舊祀蘇邱二公外增列諸賢用彰直道再廣短章勸諸貞珉以期不朽孔子曰見賢思齊焉詩云高山仰止景行行止余深有望於是則是倣者矣因書數言以誌

蘇文忠公祠記

國朝廣東
巡撫彭鵬

莆田

余髫年時讀公文章見其渾涵光芒雄視百代切切奉之然猶以爲文焉已耳既而考其立朝大節則忠君愛國不隨時俯仰雖屢遭摧抑投之荒裔弗悔不禁慨然興曰偉哉文忠行如其文真足爲吾師表者乎歲癸未余奉

命巡撫廣東偕部閣大人來瓊審理黎情謁公祠陋其制謂雷瓊道黃副使曰先賢遊歷之地山川生色草木增華矧公謫居茲土與姜唐佐黎子雲輩講學明道爲人士倡其有造於瓊甚大俎豆而尸祝之宜矣何至弗絢弗輦若是廓而新之其何敢後副使曰諾爰及賈太守協力捐俸拓地庀材鳩工姚郡丞贊理維勤正有堂中有廳外有碑門與邱海二公祠鼎建爲三而繚以周垣經始於本年三春十閱月告成請紀其役以諭後人余曰然遂記之

邱文莊公祠記

彭鵬

瓊山縣志

卷二十六

藝文記

三十

公先明一代文臣之宗也相孝宗紹烈祖致太平博洽古今著述甚富皆有裨於世教而衍義補一書自謹幾微至成功化本末內外罔不畢該可以接聖賢之傳可以贊帝王之治實與西山真氏同爲大學功臣乃僅準鄉先生社祭之義從坡公共祀景賢豈非闕典余竊有慨於斯久矣龍集辛巳按事至瓊謁其祠竦然曰崇先賢所以勵後學也况公之文章事業尤足興起百世者乎不專何崇不崇何稱庸已諸因命雷瓊道黃副使等移之爽塏而更其規制三祠並建壯麗若一至癸未季冬告成旣宇旣庭祀事有經以彰哲軌以翼休風以

砥頽俗皆於是乎在爰勒貞珉紀其由云

重建海忠介公祠記

彭鵬

品行之高由於學問公之忠貞耿介公之學問爲之也世乃以爲血性之剛不知公矣今觀備忘集文章經濟皆足千古而治安一疏尤言言至情言言至理非有大學問而能然乎故夫以末秩而折權要非妄也以小臣而觸天威非狂也以盛位而甘清苦非矯也於理見得真於心存得正於氣養得充蓋自藏修之年卽著嚴師教戒而凜凜於虧影辱先則其學問固超然遠矣余不敏學問不逮遠甚然區區之心時欲以公爲法吾師乎吾師乎

瓊山縣志

卷三十六

藝文記

三

豈有歷其里登其堂見其廟模狹隘而不亟爲更新也者顧是役也剏之者余成之者黃副使國材而董修不辭勞者賈太守棠姚郡丞哲是皆有志師公且欲瓊之士庶皆知取法乎公者嘻人盡師公天下何事不可爲哉天下何事不能爲哉庸書於石以俟

遷建瓊州府學記

國朝學政翁方綱大興人

極南大瀛海沐浴文明百寶之氣加以

聖天子道光丕冒是燹是訓環匝萬里千村百崗雅歌之聲相聞人文士氣烝烝郁郁日益登躋淳厚昌熾而遷學工適告竣其地在瓊州郡城之中後瓊

臺而前瓊山東北挹雙泉之源西引龍潭西湖南帶南湖之水會大江入於海中直城樓居高居陽爲一郡十四庠序之首中爲大成殿以奉

先師孔子旁爲兩廡自門序階闔苑移宋榑講誦之堂庖溷之所候望宿息罔不畢具經始於乾隆三十四年十二月而以其明年冬落成斯地舊試院也學故在城東南隅先是宋慶厯四年始建郡學淳熙中嘗重修之子朱子所爲記也明宏治時遷縣學於其右而城築於建學之後城廣而學偪迺始議遷學舍圯於颶又議遷會郡人吳位和等願率私錢助工僉以使者試院地爽塏宜建學乃遷郡

瓊山縣志

卷三十六

藝文記

三

學於茲而以故郡學地置院遷縣學於其西北更買地拓之於是兩學聿新郡伯桂林曹侯以郡人之意來請一言爲記方綱三至瓊觀於海觀於聖人之門則必擇其言之尤切要者記之方綱竊見瓊之士漸摩久而觀感切蓋皆知學之繫於人而關於地必擇高明顯敞之區以營之且當官吏正議修建時闔郡紳士爭先出白金至七千餘兩踴躍倡導功百其倍父老子弟恭敬趨事由此昌其文盛其科目敦其土俗是所宜書矣而又有進者昔者乙瑛之王錢史晨之家穀詳於奏祀之文而反畧於綜理之規教條之善今曹侯之政旣章於

斯民而以民情願助之實上之部使者其經營度
支條件出入之節則令紳士自推其能者核之不
以吏役稽焉是侯之敬慎公務有以輔其平日化
民成俗之爲者尤宜大書而以方綱所區區欲記
之意則尙有進焉者是學之所最切要而爲他學
所不獲有者在朱子一記而其石與字今皆無有
也其畧曰昔者聖王作民君師設官分職以長以
治而其教民之目則曰父子有親君臣有義夫婦
有別長幼有序朋友有信五者而已蓋民有是身
則必有是五者而不能以一日離有是心則必有
是五者之理而不可一日離也是以聖王之教因

瓊山縣志

卷三十六

藝文記

三三

其固有還以導之使不忘乎其初然慮其由而不
知無以久而不壞也則爲擇其民之秀者羣之以
學校而職之以師儒開之以詩書而成之以禮樂
凡所以使之明是理而存之不失傳是教而施之
無窮者蓋亦莫非因其固有而發明之而未始有
所務於外也使瓊之士知夫所以爲學者不外於
身心之所固有而用其一日之力焉則其德成行
修而無所疑於天下之理將無難者而凡所謂功
名事業云者其本已在是矣子朱子之言若此則
凡入此學者其於仰止聖人希法前賢之要道舍
是曷求乎方綱不敢不敬錄於石俾觀者深體而

加省焉則亦猶之難爲水難爲言之義矣學又有方石碑一明成化癸巳豐城涂副使棐以八分書朱子齋居感興詩也謹語曹侯遷之於新堂而和韻刊示學官弟子焉其戟門壁池宮牆面勢丈尺器物書籍典守冊目咸有司存故不具著

英佑將軍江公祠壁記

翁方綱

神姓江氏諱起龍江南徽州人官海安水師副將其封爵曰英佑驍騎將軍之神今海安所海口並有祠往來渡海者必虔禮焉謹按志載將軍爲人仁勇忠直初任水師參將駐白鴿寨通明港當雷州初開白鴿營署俱圯又無城塹可守將軍周視

瓊山縣志

卷三十六

藝文記

三十四

白鴿當郡城入海之口爲雷州左臂無白鴿是無雷矣乃捐貲立營寨廣招居民屯聚爲墟市於是舟車輻輳商貨畢集與雷城相應遂爲一方雄鎮是時順治十三年也康熙元年晉副將三年移水師駐海安口兵民帖服五年出洋捕盜風發舟覆殞焉民頌其功而思之將軍歿後叠著靈異祈禱立應雍正八年十二月布政使王士俊請於

上欽定爵號至今官民事祠逾謹方綱以乾隆二十九年冬按試至此酌酒於神祠而碑記事蹟弗詳退而考据省志郡志謹書諸祠下而爲之詩曰國語所載以死勤事禦災捍患著於祀制神則兼之忠

直勇仁功垂於疆德施於民於廓靈海神錫純嘏
儵歛駢羅靈旗雲馬作廟奕奕降祐孔多以贊
皇化重溟靜波爵由

帝命蹟爲民思官屬奉嘗子孫守之於雷於瓊標燎一
氣保疆綏民更千萬世

建萬壽宮記

雷瓊兵備道 劉庶

瓊郡古稱海外名邦而文事武功則至

聖朝而始大備地雖去京師甚遙而臣下奉職何若則
無一不在

九重坐照之中官茲土者何敢不共矢寅清以敬事者
敬吾

瓊山縣志

卷二十六

藝文記

三五

君時懍咫尺

天顏於夙夜哉是臣子之分其翼翼小心固不待歲時
朝賀始昭昭以致恪恭也而值舉 慶典則尤所當

兢兢焉然則祝 聖之宮固禮所首崇歟前此缺
而未舉非今之所敢安也臣庶與前郡守李毓元
商之鎮臣武進陞及諸將弁敬謀所以舉其禮制
者各願捐俸以襄厥工自總鎮而副參遊守自道
員而府廳州縣雖捐數有差等而藉伸葵向之心
則一爰卜地於城之西南特建

萬壽一宮外立東西門由是進爲正門列兩掖於傍八
則左右有朝房而重門居其中自兩旁入仰觀

皇亭嶽嶽儼然金殿玉陛遙臨海外焉工成之時正逢
萬壽聖節諸臣行慶賀禮紳耆民黎亦咸歡拜呼嵩瞻
仰浹旬每相率歌舞慶爲太平盛事惟其淪浹於
教養百年者甚深故其尊

君親上之心觀感興起極敬悅欣暢之致而不自知其
所以然也若是乎

聖天子之聲靈赫濯海外軍民猶且若將見之况我臣
子俯伏拜揚如覩

齋宮如仰

皇慶懍爾心志戢爾威儀能不益勵其寅清敬事俾文
事武功益彪炳於海外名邦耶卽後之効職茲邦

瓊山縣志

卷三十六

藝文記

三六

者此心同此敬同雖千萬年其將恪恭如今日斯
舉所繫蓋綦重矣哉是役也督修者瓊州府經歷
司路琨廣豐倉大使錢汝臨呈規式效指畫者邑
之庠生鍾世聖也鳩工於乾隆四年己未上冬至
次年中秋而告成焉爰識其端末垂之來茲俾考
禮制所由益備云

建武廟記

巡道

謝

樞武進人

古者爵莫貴於公侯是故先王之制祀典也五嶽
視三公四瀆視諸侯視號牲幣咸依其班沿及後
世遞有增飾我

國家禮樂修明超越千古懷柔百神典章布昭洪纖

畢舉莫可殫述恭逢

世宗憲皇帝德參造化誠格幽明以故尊崇

武廟隆以

帝號歲凡三祭做崇聖祠之制追封三代公爵祭於後
殿我

皇上復增歲事之費頒祝嘏之文昭報之隆亘古僅見
斯誠禮制崇隆神人胥悅也已余膺

簡命備兵雷瓊下車後遵禮參謁 廟在道署右畔抱
珥山巔卽所稱瓊臺也明初改建歷今垂四百年
基址偏仄不合程式明宮齋廬並無其所因念春
秋將祀文武咸集難於成禮而且多歷年所瓴甌

瓊山縣志

卷三十六

藝文記

三七

傾敝榱桷朽腐非更張而恢宏之其何以妥
神靈而昭

國家備極崇祀之大典歟公務餘暇遇有司進見與
論吏治得失自簿書錢穀而外凡一切壇廟爲秩
祀攸關者靡不講求素知瓊山令楊君遠惑具敏
練才又勇於公事乃集文武僉議移建之舉而以
土木之役畀楊君董其成於是擇地於府學宮之
西東西得八丈有五尺南北二十有五丈各捐廉
俸都得一千二百餘金庀材鳩工興役於乾隆九
年十月越明年五月訖功夫因陋就簡吏治之所
以日竄也奮庸興事風化之所以維新也而衆志

輯睦詢謀僉同協恭之所以共濟也是役也轉移
在跬步之間舉昔日之棟宇垣墻酌量而增廓之
遂覺規模宏做體製尊嚴與徽號爵秩赫奕相稱
可不謂用力少而成功多也歟欽惟

聖諭諄諄居民上者不得以官爲傳舍然則廟宇之制
必規於度而諸君子不生異議不辭勞瘁俾海外
荒鄙之地曉然於祀事之鉅典斯亦無忝厥職之
一端也故於其落成也礱石而爲之記

重修潘公河碑記

國朝巡道 德 明

郡城南河由東門橋迤邐而北下達海口其來舊
矣自前觀察潘文恪相度地宜鳩工興修瓊人賴

瓊山縣志

卷二十六

藝文記

三六

其利勒石河干名曰潘公地以人傳也十餘年來
半就淤塞每水涸灌溉無資舟楫弗通名存實亡
識者惜之余監司雷瓊歷訪民隱知潘公河之爲
利鉅而開濬宜亟也抑舊制猶有未盡應畧爲變
通者夫河有上流下流有旁流是河之源一發自
龍湖本支甚淺一發自廕潭謝潭并入博冲大河
旋轉而出其勢爲大河所奪細流涓涓無由利濟
惟於北冲口遮設滾壩則二潭專一內向而上流
裕矣下流出窰窰外與潮接潮落輒涸於下窰口
鍵以石閘隨時開閉水少蓄其勢使不遽下多則
洩之庶下流源源可繼矣蓋二者河之樞紐潘公

僅治河身於前茲則交治河之源流於後者也且此猶爲水少計也夏秋霖雨時降一河不足以受兩源之水又於旁流舊河久經塞築者敗爲減壩俾落有所束長有所分而全河之大勢底績矣先是副使王公斗南暨太守宗賈二君與夫鄉之薦紳於潘公前屢有修治至潘公而功愈茂名愈彰今雖變而加詳總此惠農田通商旅百千年利濟吾民之心而已是役也羣情鼓舞樂事勸功共費白金八百兩有奇四越月而工竣郡丞李君諳河務多資贊勸昌化伍令與有勞勩鋪前巡檢潘景魏瓊山典史劉起坤奔走從事例並得書是爲記

瓊山縣志

卷二十六

藝文記

三十九

新建瓊山鴈峯社學記

國朝 巡撫 德 保 滿州人

瓊州在大海之南土地沃衍人物馴雅而文風稱盛於嶺表乾隆庚寅歲余撫粵下車采風諸郡瓊士咸踴躍鼓舞度越重洋而以文投獻閱其文率典雅醇正有先民遺架良由

聖朝聲教覃敷漸被遐陬海澨涵濡沐浴百有餘年以故南溟竒甸之區巨漲炎烟之域英才蔚興家弦戶誦媿盛美於中土昭邛治之同文豈不休歟今年秋編修吳君典自瓊來謁爲言新建鴈峯社學落成乞一言以記其事地舊爲郡庠遺址在郡治東南隅其前三峯橫亘爲鴈塔三元峯先是瓊州

鴻雁不至自邱文莊讀善郡庠時始一來賓公爲作鴈集瓊庠記嗣郡之紳士以黌宮頽水近偏城闐觀瞻未稱會颺風迅發棟宇飄搖籲於官購校士館地更易之而鼎新文廟焉於是故基闕隙形勝家咸謂地屬郡左青龍不宜低陷僉議請建築社學其名以鴈峯者表三峯之勝槩兼以示不忘昔賢遺蹟也抑余更有說焉古之教者家有塾黨有庠術有序國有學社學之設於國學爲始基古之學者七年則小成九年則大成所謂大成者豈惟是挾策呻吟求工於文藝之謂蓋將以崇本敦實明體達用而實有所表見於當世也文莊以儒

瓊山縣志

卷三十六

藝文記

四

生崛起海外追其通籍後啟沃君心釐剔朝政卓然爲一代名臣今諸生幸生文莊之鄉誦習文莊之故地卽當步趨乎文莊之爲人詩有之高山仰止景行行止他日占鴻漸而筮羽儀實有以表見於當世焉此則大成之詣余所爲遙望瓊臺而殷殷致願者也社學凡建講堂五間文奎樓五間東西兩齋十二間大門三間周以垣墻規模整肅封編修吳福暨紳士等八人實捐貲而經理之共醵白金四千兩需用及半餘以置田諸紳士輪掌其歲入爲延師膏火并士子賓興之費余嘉封翁是舉之有造於鄉與編修之繩武濟美且欲使瓊人

之知所矜式而興起也爰諾其請而爲之記

新建蘇泉書院記

郡伯于需閩中

瓊士之以能文著也自宋姜唐佐始也瓊士之與於進士科第也自宋陳孚始也河源涓滴僅資濫觴迄乎有明盛時而瓊山邱文莊公出焉領鄉解掇高第回翔玉署容與黃扉而且著述等書身巍然爲一代大儒後進之士親炙興起咸思淬勵成立致身通顯而科名鼎盛仕宦顯榮藐茲一島四州幾與吳楚同風然讀文莊家傳載其天生異質讀書過日成誦旣領解額赴春官試不第則詣太學以卒遠業旅食京師者凡八年記此八年中所

瓊山縣志

卷二十六

藝文記

聖

得於名公鉅卿之議論丰采直諒多聞之切劘觀摩與夫蘭臺虎觀之藏天祿石渠之秘所以開擴其見聞增益其心性者不爲不多矣其資之敏也如彼而學之專且久也如此以此知遠到之器不朽之業爲偉男子所自樹立而苟簡因循者不能幾也 國家文教覃敷浸淫周匝百年以來海隅徼塞四方萬里之外荒山僻壤之士皆知奮興不甘自棄於

堯舜之世乾隆九年余膺

簡命典郡斯地月課諸生及歲科試童子求所爲切理脉而合繩墨之藝絕少聞一有之亦乞靈於兔園

冊子而已細推其故大抵一衿已青便束書不觀
至有老死牖下終身不一赴秋闈者人事不齊因
而科名仕宦落落如晨星不得謂人材囿於地力
也雖然情窳成風咎不獨在下也鼓舞董勸司民
牧者實操化導之權余乃擇勝於浮粟井旁爲建
書院之計適瓊令楊君遠惑雅有同志乃俾之董
其成合捐廉俸塹山填壑建講堂繕學舍備器用
計爲屋四十八間計費白金二千餘兩計時日十
閱月而役畢於是延師以課之膏火以伙助之多
購經籍以醞釀之曾子固有言士有聰明樸茂之
質而無教養之漸則其材不成是則余與令之任

瓊山縣志

卷三十六

藝文記

四

也傳曰學猶殖也不殖將落是則汝諸生之任也
諸生肄業此間遊蘇公之宇飲蘇公之泉想像遺
徽既有以澡雪其精神而且曉望晚眺值夫碧溪
新漲悟風水之渙我以文章也綠野香荷欣池沼
之貺我以君子也秋則亭前皓月占蒙養之正冬
則檻外寒秋見天地之心蠹兀凌門而有初陽之
塔影清輝拱几而有百雉之霞光由是觀之四時
之變晦明風雨之勝景其足以相天機而拓文心
又當何如有志者能勿蹶然興歎故於其落成也
榜之曰蘇泉書院而詳述鄉先輩之所以盛繼此
之所以衰與今日欲復還於盛之機以懲憑諸生

而勒於石俾後之人得以觀覽焉

新建普濟堂記

瓊山 楊宗秉 古絳人

瓊之俗信巫不信醫瓊之異產足以聚四方之客而地又處南離之極火行獨旺以故五運六氣之沴迴異海北而蒸爲黎瘴颯爲海風境外人多不相宜於是隻身徒手之客深入黎岐致貨海口以逐蠅頭之微者冒嵐風衝蛋雨恒易爲所中傷夫貧民爲衣食所累輕去家鄉以謀錙銖斯已悲矣乃又貿貿焉客於風土炎熱俗不信醫之瓊迨其病也扶持無人調攝無資熒熒一身形影相憐斯固濟人利物之君子所惻然動念者也乾隆五年

瓊山縣志

卷二十六

藝文記

四三

前令杜君率士商創藥王廟一座三楹廚房一間延習醫一人居住調養貧病孤客乾隆七年前令江君詳准撥定安臨高二縣充公榔羨銀共五十餘兩解瓊支給藥餌口糧之需二君規畫區處意美法良洵可爲勤求民瘼而惠及行旅也已未幾舊廟以地基低窪復經風雨薄蝕棟宇牆壁岌岌有傾覆之虞而且無房屋以棲病者也無床几器皿以備用也是其名與實之不相副也余乃縮廉俸折去舊廟填高故址更張而鼎建之又增置向北迴廳三間東西廂房六間捲篷一間什物之用庖湏之所犁然皆備周繚以垣外爲大門規模恢

宏器用稱具來此者頗有如歸之致因顏之曰普濟堂嘗考周禮太宰之屬有醫師掌醫之政令其屬有疾醫以治內證有瘍醫以治外證凡邦之有疾病者疔瘍者造焉使醫分而治之歲終稽其醫事以制其食夫先王之設官也方技小道職之以上士而又隸於天官其爲變理補救之道意義精微以故民無天札物無疵癘咸相安於蕩蕩平平之世余承乏斯邑冰兢供職外念無以酬

皇恩與

憲德者故緣飾前人之意而革故鼎新且增擴其所未備以竊比周官於一二昔范文正公未遇時不

瓊山縣志

卷三十六

藝文記

四四一

得爲良相則願爲良醫語曰上醫醫國其次醫人醫國者良相也醫人者良醫也二者余皆未之能也然其意有與古人合焉者余願後之君子勿小視此意而護持之俾永勿壞則斯堂之所濟者誠普矣夫是爲記

修文峯塔併重建文昌祠觀音堂茶亭記

楊宗秉

出郡西郭門折而南八里許平蕪蒼莽中一塔巋然曰文峯考郡邑志載南門外有雁塔三元峯久圯又有雁塔亭元建明萬厯間郡伯唐公可封移郡學後三元碑暨峯上欲築峯爲兩學文筆不果

詳此則三元峯爲唐公所建然無所謂塔也其載文峯塔條下云瓊人謂此塔闕係文運盛衰自塔圯六十餘年科第寥寥並不言建於何時建之者何人再考副憲焦公映漢重建塔記稱先是有石塔簪之如立筆狀是則雖有塔之名未必能如茲之浮圖七級也康熙四十三年甲申郡伯賈公棠偶卓長木一杆於舊址標識其秀越明年大比瓊屬中僑者六人爲

國朝來所僅有而塔係文運之說遂信而有徵於時當道倡捐合諸紳士得三百金付瓊令王君獻甫合其尖比訖事共費九百餘金此文峯鼎建之由

瓊山縣志

卷三十六

藝文記

四十五

距今剛四十年歲月未深前此勦事之人猶有存者固能縷縷陳說也旣而王君就塔前建文昌祠一所三楹翌以兩廊六楹祠外建茶亭數椽以憩行人蓋塔勢孤標秀干碧落復得此祠以增其勝洵巨觀也無如颶風暴雨不時造作邇來塔級闌干陵夷崩頽而祠宇內外腐柱朽椽傾欹難支敗垣殘瓦穢積滿地一望荒煙蔓草無復過而問者乾隆十一年余旣與 府憲于公合建蘇泉書院集師先敬業其中書聲朗朗淪天地而夏金石習經義生成有起色邑紳士仍籲余借助於地靈也余欣然從之捐廉俸二百餘金鳩工庀材擇仲冬

之吉修復名塔磴級雕欄煥然改觀復於塔之南
北重建文昌祠三楹觀音堂二座各三楹左側茶
亭三楹外繚以垣鍵以大門三闕月而工告成夫
青鳥家言儒者所不道瓊當前明科第盛時未嘗
邀靈於此塔也卽此塔已建以來瓊人士未聞能
步先哲之後塵也而謂文運盛衰實關乎塔其果
足信也歟然而買公木杆則已著驗彰明矣究尋
其故或者瓊境火行獨旺塔適當離象文明之位
譬諸滿庫硝黃得一星火線遂致煙燄彌空此則
木杆成效之說也然易發者火易燭者亦火也火
將盡矣必得薪以傳之然後復燃之勢炎炎不絕

瓊山縣志

卷三十六

藝文記

吳

此則余茲重脩之說也大抵三才之道相附而行
平陂往復有必至之理在有心世道者乘其時而
振興之耳他時海外文運重起媲美前人雖不必
歸功於此塔而余實備官斯地則亦未嘗不與有
榮施也是爲記

重建天寧寺記

楊宗秉

郡郭內外梵宮釋宇無慮數十於天寧一寺而重
建之者何曰復古也其爲復古奈何志載此寺昉
於宋名天南元更今額明人又移置而式廓之計
其厯劫固已五百餘年之刹也古之宜復者夥獨
以天寧爲古而復之者何曰此非刹之古之謂而

前人尊親禮法之場也其爲尊親禮法之場奈何志載明初郡邑迎詔官師習儀皆在寺中迨萬厯間郡守唐公可封建藏龍亭於正殿後安奉萬壽龍牌於是歲時朝賀慶祝諸大典無不藉此抒誠展禮而屢修屢圯亦旋圯旋修不惜捨官府紳士之金錢者匪特爲禪定梵誦之林而已也

國初習仍簡樸

萬壽龍亭或奉移公所或奉移考院今則

萬壽宮闕赫奕天表此寺不爲官府所遊歷者荏苒百年而緇流輩復罕能支持山門以故古刹一敗塗地法像露天釋子並無託足之所匪伊朝夕矣余

瓊山縣志

卷三十六

藝文記

四七

泣瓊之明年邑人有以重建古寺請者計其役浩費大非一肩所能勝任旣而念餼羊小物尙關大典而况有明一代荒徼浮嶼之臣子所藉以序班聯之肅穆抒忠愛之悃愾糜費物力建不一建修不一修布在志乘章明較著而顧聽其影沈響寂消歸無有其爲後人之憑弔歛歛者豈但愛羊之失哉余乃倡捐一百二十金合諸紳士行商所釀都得六百餘金延邑中庠生林君世聖總其事捐吉興功建正殿三楹重簷複道爽塏虛白前爲金剛殿三楹又前爲大門三楹僧室齋廚備具繞以短垣塗以黝堊復重飾法像莊嚴鉅麗越期月而

工竣是役也不踰制不糜財既宏既壯亦華亦堅
前人稱爲海南第一禪林者於今乃復見之豈惟
晨鐘暮鼓重聆古刹之餘韻抑亦足令來茲論世
者得所證據也故伐石而記之

遊大悲閣登明昌塔記

蘇泉書院掌教楊纘烈 大埔人

中秋前三日武溪馮愧齋元侗瓊臺邱衡之璣二
明經邀余遊大悲閣閣離書院二里許閣後一塔
巍然名明昌則浮粟泉亭所日夕瞻眺者也出書
院折而東行不數武衡之指謂予曰蘇公雙泉故
跡一在書院一在此坡之麓田塍間幼時及見豐
碑穹隆大書蘇公雙泉之一字樣去浮粟咫尺地

瓊山縣志

卷二十六

藝文記

四八

耳井渫不食日就淤塞今則碑石亦摧斷不復見
矣易曰時舍洵可惻夫將抵閣過一畧約愧齋曰
予得句矣紆迴竹徑橋通寺予應聲曰徙倚泉亭
塔對門衡之曰邑誌塔爲萬厯間郡伯涂公文奎
邑人給諫許公子偉糾鄉士夫合建者也愧齋曰
子聞志載海忠介公春日同許給諫諸文學登明
昌塔絕頂詩乎遂朗誦曰縹緲丹梯此共登側身
雲壑擬飛騰天連滄海孤懸嶼人立青霄最上層
望氣幾年逢尹喜傳衣何處是盧能摩空捧日屬
吾黨雁塔龍門次第升予曰此詩不類必爲好事
者僞託未幾僧法空道迎進閣閣前後兩座皆三

楹氣象光潔花木清幽頗有靜致茶畢予與衡之
轉出閣後攝齊登塔之第一級四面瞻眺心目曠
夷忽海風怒吼絺綌淒其凜不可當乃亟下仰視
正南塔門橫嵌一石鐫明昌塔三大字左記萬曆
三十八年歲在庚戌季冬吉旦右列瓊州府知府
翁汝遇同知某通判某推官某鼎建共三十九字
正北一石年月與正南同正西一石左記萬曆二
十五年歲在丁酉孟冬吉旦右列瓊州府知府李
多見同知某通判某推官某鼎建皆共三十九字
正東一石僅存萬曆四丙申肇基七字其四字之
上下皆模糊不可識諦視右邊依稀文奎二字予

瓊山縣志

卷二十六

藝文記

四九

謂衡之曰修邑乘者曷不據此且計建塔費不下
萬金僅此一片石載年月姓名不別立碑作記誇
張豪舉此前輩古道可法處也旣而風定復登塔
故七級八觚每級皆嵌橫石八方各有題識及姓
名大抵李翁同時人登至絕頂第七級有橫柱一
字多剝蝕第一行爲吏部左給事中臣許子偉拜
手十二字第二行爲太祖高皇帝稱南溟奇甸十
字餘語似贊似銘總不及建塔原委其末一行爲
龍飛萬曆二十七年己亥辛未月甲辰日鐫十七
字至是全塔有字之石皆竭目力細辨之矣雖當
登高無暇望遠每降一級命從人持筆研或備或

殘抄所可辨嗣是寺僧具齋畢徐步踏夕陽歸舍
去故徑登平隴周望海山斜暉暮烟竹樹秋色蒼
然就淺草坱莽中隨意闢蹊而行仍晚二先生小
憩書院淪茗取架上郡邑志參考之按邑乘載建
塔爲涂許二公考府志秩官一册涂卒於瓊任繼
之者爲李公多見歷吳公尙友倪公凍卽爲翁公
汝遇皆不載歷任年月涂無傳李翁二傳不載建
塔之事當是載筆者簡畧抑善政有在塔固無關
於輕重歟獨怪許給事傳生平義舉一一詳記何
以竟無一語道及協力建塔一事再考海公於明
世宗朝以戶部主事建言忤旨詔獄穆宗立詔復

瓊山縣志

卷二十六

藝文記

五十

其官改大理擢僉都御史巡撫應天尋棄官歸里
閱十五年起用南僉都御史是爲萬曆十三年乙
酉洊歷吏部右侍郎右都御史掌南院越二載丁
亥卒於官而許公於前一歲丙戌始成進士詩題
何以遽稱同許給諫耶衡之曰海公墓碑見鐫護
喪行人許某云考古之學以金石文爲覈今據塔
額年月由丁酉逆數至丁亥海公卒已十年由丁
亥順數至庚戌海公卒已二十有四年矣乃不寤
登塔一詩爲僞而登諸藝文而謂珥筆纂修者果
足傳信否耶總之此塔之建涂與許或並有椎輪
之功而實資李公經營復賴翁公而後合尖則確

無可疑修志者獨歸之涂許疏漏已多至於海公在乙酉已前逍遙林下有可以登塔之日而實未有可登之塔此詩出於僞託亦確無可疑修志者於此得毋蒙朮昧之嘲歟二先生皆首肯曰然於時柳葉徐鳴月色如霜愧齋援洞簫奏水龍吟一弄別去乾隆十一年記

重葺金粟庵正殿併新建禪堂記 楊纘烈

蘇文忠公精熟釋家言機鋒說偈真能游戲三昧爲一時高僧所懾服以故生平與大覺寶覺圓通參寥寶月輩往來贈答甚夥當榮任之日且爲佛印解玉帶以鎮金山其豪宕豁達之趣尤非世俗人所能測識寓惠時辯禪師欲通書而南華淨人皆輕千里爭請行猶欲一見東坡翁求數字終身藏之洎乎居儋以來嶺海遼窻知交音耗多濶絕無問方外友矣然而後之人景仰遺徽每於過化之地尸而祝之併欲有以闡翼公之慧業此金粟庵之所由附建於祠西也乾隆十一年瓊山 家明府旣與 府憲于公合修蘇祠復拓左右基址鼎建蘇泉書院走幣三千里外延余掌其教事居常以此庵庠隘與祠不稱爲嘆而余鄉親友之文雅嗜義客寓此邦者以余故枉駕過從相與坐庵中汲泉淪茗披襟話舊亦慨然有重葺梵宇改築

精舍之意其明年明府倡捐而欣然樂助者遂得十一人工料畢集閱月落成於是規模宏敞輪奐燦然而面城枕崗連村帶畝林泉之勝風物之光真堪以祈宗風而與金山解帶之意頗相彷彿想蘇公在天之靈應罔時恫不獨足供文人墨客之遊覽吟嘯已也故顏於堂曰玉帶遺徽用誌景仰之誠云爾維時襄事者考授邑佐則陳君國安明經則林君中鳳陳君益滉黃君科先太學生則黃君祖成李君珍陳君士珏許君飛鴻黃君大輝其一則余也皆潮人董理土木諸務則邑人生員鍾君世聖也是舉也役浩人寡例得備書

瓊山縣志

卷二十六

藝文記

五十一

京都瓊州會館記

國朝編修吳典

瓊州去京師九千餘里人士之至止者稀以故他郡多有邸舍而瓊獨闕焉公車之上南宮選人之赴吏部往往寄寓全省行館屋少人衆或不能容有力者僦屋以居否則投諸逆旅湫隘雜沓要挾苛索不可終日乾隆己丑典官京師始與郡人謀建會館壬辰春買宅於正陽門外靈中坊大外郎營北口內其屋三重圍以旁屋計十七間又買屋左隙地縱十二丈橫五丈五尺共用白金五百六十兩壬寅仲秋乃改造焉屋之西向者易而東向凡爲堂三間前廳後寢各五間旁屋十有一間又

於其左內外各建屋三間其外爲大門門之右二
間租息以備修葺費館人工食亦於是取給通爲
屋三十二間有半其東北隅尙餘隙地一段以俟
他時補屋計用白金一千七百有奇先是己丑歲
定議建館郡人共捐白金九百六十兩買屋有餘
則以逐年生息至壬寅而得八百金郡人又續捐
九百金共一千七百元以充改造用事不勞而工
舉於是基廣而勢完外堂內寢統以雜室庖溷廡
楹紆曲有容瓊人萬里而來者息肩投足至若家
居鄉語喧嘩忘其爲客不復有湫隘雜沓之虞與
夫要挾苛索之患矣夫以典官京師闔一郡之力
可不誌其緣起方今

瓊山縣志

卷二十六

藝文記

五三

經營十餘載始有一區之屋以供鄉人之偃息不
文明日盛瓊之人交臂而至者日益衆後之君子有能
珍護其已然充益其未然無俾人謂吾瓊邸舍不
他郡若也則是舉固爲其嚆矢矣壬寅改造之役
候選知縣會同吳君嗣湖候選訓導歲貢生會同
陳君江定安程君學道候選縣丞瓊山馮君漸并
著勞焉例得備書

雁峯社學記

同知 陳景垣

學有社所以萃子弟之秀而良者延名師訓迪之
以使之成人與當道書院義學異號同功而於間

閻尤切近瓊邑自宋元來代有社學悉頽廢里紳
吳福溫星陽兩喬梓暨杜常輝何朝輔馮文忻毛
映斗輩嘗殷殷有志建設而未逮焉歲己丑郡學
移府治左而以舊址爲試院院之旁多隙地地處
僻隅屏闐喧雜聲藏修讀書固其所也一日其
子若孫承先志以旣厥工而丐記於余夫好善之
念秉彝同之然前之人見善輒鼓舞子若孫視往
訓爲陳言不復記憶記憶之亦以爲非必不可緩
之務而漠然置之者常也余愛吳氏諸後嗣各輸
白鏹經營盡善不分先後不計盈絀各體乃祖乃
父之志以爲志莫留遺憾惠及鄉人有如是者而

瓊山縣志

卷二十六

藝文記

五

能以不文謝哉學成璀璨光明一律完固令捐金
者書姓氏勒碑陰遜謝不遑謂前人志弗敢自居
其功也然則前人之大有造於瓊之人者終無以
示來茲耶卽書乃祖乃父各名字附祀先儒之左
使讀書其中者飲水思源不忘所自誰曰不宜是
學也定圃德大中丞爲之記矣所以垂訓瓊人士
諄諄於肄業者之誦習文莊故地當步趨文莊之
爲人他日羽儀

王國有以表見於當世者之意深且遠諸生步趨前哲
其勿忘中丞屬望後起而不遺濱海一隅之善教
也夫

重修文峯塔碑記

國朝呂子班陽湖
郡守

瓊州府城西南八里許丁村舊有文峯塔位宅丁方離明象也歲久傾圮康熙甲申賈太守棠於遺址植表以助文明其明年乙酉郡中掇科者六人由是重建新塔戊子瓊山令王贇於塔前復立文昌祠厥後一修於乾隆丙寅瓊山令楊宗乘再修於癸巳邑紳吳位和等咸有徵應載在郡邑志乘故郡士僉謂此塔興廢關繫合郡文風盛衰其言有驗今距再修之歲又五十三年矣風雨摧剝日就殘闕郡士屢欲新之而未果也本年正值乙酉鄉試余商之府學教授張衍基訓導王紹曾集邑

瓊山縣志

卷二十六

藝文記

五十五

紳符魁泰亟謀修復官捐資爲倡而邦人士樂助工用相與有成肇工於四月二十日越某日告竣人和旣彰地利斯得崇祠傑構煥然一新矣旣訖事郡人請予文以紀緣起余維瓊郡當炎裔在洪波浩瀚之中爲南溟奇甸朱明鬯朗精氣上華其扶輿旁薄之氣蔚爲人文理學氣節之士先後焜耀史冊而說者以全郡形勢四州環島中高外坦濱海之地益趨平衍不立崇基以鈴束之則地脉泄散文氣因之不振茲塔修建歷有嘉徵操券不爽雖形家言儒者弗尙然古人建國首重辨方而相陰陽卜瀝澗同見采於孔氏列於詩書則其說

亦未盡誣也且夫吾人爲學若建塔然學有本原
堅貞篤實一塔之厚其發址也循序漸進不凌不
躡一塔之等其階級也由是下學而上達希賢希
聖以馴致乎登峯造極之詣其與飛甍流聖繼長
增高薄清景而凌絕頂者更何以異然則塔之有
繫於人文而郡士之仰止斯塔也亦宜雖然余之
有望於郡士者則尤願其稟山川清淑之氣發日
月沐浴之英忠信仁義以固其基文章政事以崇
其業功高而無傾節峻而不拔將見人傑地靈英
賢挺特處則爲坊表之君子出則爲柱石之名臣
以彰

瓊山縣志

卷二十六

藝文記

五十六

聖天子嚮明繼照聲教南暨之盛軌又豈區區科第之
榮侈言地利而已哉昔東漢邵陽令曹全開南門
望華嶽使學者各獲人爵之報刊石紀辭垂諸奕
世則是舉也允當勒之貞珉俾後之人知有基勿
壞勤修以繼前美不亦善乎所有捐資姓氏出入
支銷各數詳載碑陰茲不具著

重建瓊臺書院碑記

國朝費丙章仁和
巡道

嘉慶二十三年冬余奉

命分巡雷瓊道明年四月往視事揚帆渡海恬波不驚
入其境見其士樸而能文其民謹愿而不好鬪風
氣近古心甚嘉之竊念觀風整俗使者之責也暇

日召其縉紳耆老於庭而告之曰瓊地廣袤千餘里經涉重溟物產饒衍與郡內都會埒自宋以來厥有聞人洎我

本朝深仁厚澤化被無外士之懷抱瑰特聲稱卓越掇巍科而膺顯仕者不絕也夫欲齊民俗者自端士習始欲導士習者必自書院始曷思有以舉之僉肅而稱曰瓊有書院曰瓊臺厯年久遠棟宇朽蝕不可以居逞者督學傅公以試事蒞茲土捐廉銀四百爲修葺費尙未及舉前觀察左公銳意任事尋又遷去今公復有命瓊人士之幸也夫重學校釐文體學使者之責也若設書院爲敬業樂羣

瓊山縣志

卷三十六

藝文記

五十七

所實守土者之責乃學使者先守土者以勤其事爲多士勗意甚厚也余承左公後責曷敢辭乃以前項四百爲之倡於是同官率分俸助之士之慕義者捐輸若恐後時二十五年七月始作十二月落成且請余文以記蓋擴舊址易戶向凡爲門若干重爲堂若干楹爲齋舍若干栝庖溷之所咸具建奎宿之閣於后左下祀宋周程張朱五夫子與其鄉先賢邱海二公功速而事不煩於是歎向之所心嘉者爲不妄也夫士莫先於立志立志之方在乎善學人苟營情於利祿之途鹵莽滅裂視五經若贅瘡束三傳於高閣日取兔園冊子咕嗶伊

吾而欲弋獲科目之榮淺矣縱科目可以弋獲而欲從事於聖賢之道得門而躋堂是猶壁孔而欲覩日月之全光也是猶斷港絕潢而欲趨至於海也吾願諸生肄業於茲者饜飫乎詩書之圃優游乎仁義之園被服儒先遵循師訓必使處而德行見重於里閭出則經濟見稱於當世斯爲不負使者之厚望焉若夫修鹿洞之學規紹紫陽之教澤斯又掌教者之責而使者之所企也是役也費計五千金董其事者郡人官獨司其成云

重建瓊山雁峯書院序

知縣 于學質

昔子產之治鄭也曰太上以德服民其次莫如猛

瓊山縣志

卷三十六

藝文記

五十六

古今之稱循吏者莫不以子產爲師法蓋其殖田疇誨子弟以養以教然後父母斯民之責可以無負予自需次粵東權篆十餘邑每攝一篆旣以勸農桑敦教化爲本務雖才力不逮古人而區區此心亦可以共喻諸爾百姓也粵稽地志瓊環大洋土沃民饒居南離之極人文蔚起如前代邱文莊公海忠介公餘韻風流興起百世爾多士耳濡目染有不厚自期許者非情也况逢周道憲呂府憲振綱飭紀興賢育才爾多士食德飲和不爭自濯磨者又非情也考瓊郡十三屬各有書院而瓊山獨無適有雁峯社學奉道憲行查在案地本瓊

庠遺址面對雁塔三元峯前邱文莊公讀書於此羣雁來集著記以紀其事乾隆三十九年八家紳士創爲雁峯社學今已學舍荒蕪苔垣薛壁予因稟請道憲改爲書院憲曰可於是廢者興之狹者闢之并以瓊山雁峯書院顏其額雅不沒前人美意故曰重建云耳然而經費浩繁工程鉅大選擇拔貢生王公天佑董理其事經營圖度晝夕勞勞又幸諸君子鼎力捐簽助予不遠衆擎易舉兩月告成繼自今延名師設膏火俾諸生藏焉脩焉息焉游焉處焉爲正士出爲純臣以仰答

聖天子壽考作人儲才育德之至意是豈惟生斯土者

瓊山縣志

卷三十六

藝文記

五九

之光宰斯土者亦與有榮施也是爲序

重增瓊山雁峯書院膏火碑記

知縣

蘇 棨

學校者所以維風俗人心以興起文物者也我

國家殷殷立教澤宮而外各府州縣皆飭有司謀及

地方紳士設立書院以樂育英才而又置田爲脩

脯資瓊邑雁峯書院在瓊郡治貢院東前令于君

改社學爲書院講堂學舍煥然一新乃經費不足

需旣無幾故肄業者尙屬寥寥苟非增其餼廩廣

其額數將何以可大可久振士氣維風教於勿衰

余蒞任之始入院觀風慨然有志增益首先捐廉

俸洋銀四百四十員易制錢三百五十二千文爲

倡爰謀之值事廩生林瀛王魁衡等廣集邑之紳士設法勸捐凡吾力所可及與衆志所樂輸者不憚多方籌畫務期集腋成裘積篲成山閱一歲共勸捐得洋銀三千四百二十員易制錢二千六百四十八千文共結得銅錢三千千文發當商生息按季分繳爲添增膏火之需從此膏偕春潤火以薪傳琅琅書聲出於金石而余亦得於簿書之暇相與橫經講學循循於孝弟忠信之行兢兢於禮義廉耻之大庶幾氣運文風日新月盛上副

朝廷樂育之意不獨斯文之幸亦官斯土者所厚望也事既成因定章程並誌捐貲姓名勒石以示來

瓊山縣志

卷二十六

藝文記

卒

茲是爲記

昭忠祠記

署巡道張培春

瓊州爲南極奧區外海內黎防守綦要蓋山海危險之區亦志士慷慨立功名之地也

朝廷設水陸大營立闕帥領重兵鎮之萃材勇之士養之行伍之中優其廩祿設之官涖之長教孝教忠使之諳練服習以成剛果健銳之材異日建功立業由此其選其或遭際叵測罹於禍患則贈終有制恤亡有典享祀有祠嘉慶八年

勅建昭忠祠續奉

恩旨准將出洋捕盜傷斃淹斃各官兵附祀著爲令瓊

郡昭忠祠向在東郊浮粟庵之左近歲遇風災祠
宇傾圮木主填委瓦礫中道光十二年本鎮黃公
建功巡洋舟覆隨行官兵殉者百餘人皆不得入
祀露濡霜降之辰令人盡然傷感權中府何公朝
亮倡議改建新祠僉以爲然因相與規畫各祠請
於鎮府設冊勸捐道府廳縣暨各標營將領兵弁
皆踴躍捐輸贊成斯舉得地於鎖鑰門外創建祠
堂三楹崇隆巍煥規制巋然中祀黃公建功而水
陸各營前後出師陣亡洋巡淹沒并捕黎傷斃官
弁兵丁悉以次設位稱焉祠在水陸兩營適中之
所與江張二公祠衡宇相望死事諸人隸瓊籍者

瓊山縣志

卷二十六

藝文記

在

多居近祠數里之間其父兄弟瞻望豐祠屹立
念祠之所由來與官之所以隆重此祠者咸咨嗟
太息感激泣下甲午夏新祠落成余由廉州守來
權兵備具牲醴設長筵奏軍中鼓樂合寅僚肇修
禋禮一時冠帶之弁稱戈之伍相與駿奔走執豆
籩莫敢不共莫敢不祗若是役也氓人神之恫贊
聖天子旌揚曠典使人觀感奮發鼓其忠義之氣而堅
其敵愾之心有裨於世道人心誠非淺鮮至於率
作興事必躬必親則何公暨署右營守備黎君必
榮實爲之余爲綜其始末書諸石後之登斯堂者
必怵然有動於中而以諸君子爲當務之急矣是

封又值

聖天子嚮明繼照聲教暨訖海溼山陬文明丕振故皆家有塾黨有庠文人士氣蒸蒸日上千村百崗雅歌相聞焉癸丑冬余自肇羅移巡雷瓊暇輒課士瓊臺雁峯兩書院見夫室宇修整諸生以時肄業其間深喜其彬彬然有儒雅風越乙卯冬鄉塾環江書院適告成內祀

文昌帝君外爲講堂翼以兩廊繚以周垣講誦庖湏之所罔不畢具邑學博張伯琦與多士等期善作者之必善成善始者之必善終丐余一言記其事以昭示後人余以獎善勵俗使者之責也因樂據其

瓊山縣志

卷二十六

藝文記

三

事而書之其地在瓊山調塘二都距郡七十里平疇突起一墩廣約里許東爲張家園書院適踞其巔之西居高居陽兼擅一方之勝面三江而背七星左尼山而右石灘邇則帆影參差波光上下水石咽激聲戛洪鐘遠則諸山羅列勢若星拱蒼翠詭伏綺縮繡錯歌咏之餘仰觀俯聽足以怡情適性陶寫天真誠讀書奧區也抑余尤有說焉夫所謂讀書者豈僅工帖括博科名之謂蓋將嚙嚙道真涵泳聖涯養根埃實體克用腓學問經綸期大有裨於當世如邱文莊海忠介以儒生崛起海外厥後正色立朝或訂謨讜論經術湛深或剔蠹鋤

奸忠貞鐵石本氣質爲文章均卓然爲一代名臣
學者幸生其鄉當企其爲人孔子曰見賢思齊焉
詩曰高山仰止景行行止苟是則是傲亦步亦趨
他日斧藻皇猷峻嶒氣骨與文莊忠介後先輝映
不徒爲章句之儒是則余所厚望也是舉也肇其
迹者吳張陸王鄧宋六姓分爲十家釀金積資以
裕賓興膏火至鳩工庀材構造堂宇則剡之者貢
生張伯琦贊之者增生張其泰附生吳漢章躬勞
厥事者則附生陸海王天樞王懷秀張罔書余嘉
是舉之有造於鄉與諸生之黽勉趨事襄成美舉
且欲使鄉之士知學當實有所表見於世並望兩
郡各鄉聞是風而興起焉庶皆廣廈大庇居肆成
事處則純儒出則純吏不必區區功名事業卽所
謂功名事業者亦超出尋常萬萬矣爰書數言以
告有志之士

瓊山縣志

卷二十六

藝文記

六

添設書院外課膏火碑

陞授山東按察使司雷瓊兵備道黃 示爲曉諭事照
得本陞道蒞任以來雖日以振興文教培養人才
爲汲汲而才學未裕教術多疎兩載於茲寸衷滋

愧今復蒙

恩命陳臬山東行將告別其惓惓於諸生者正無已也
所有前年本道捐廉三百千生員張朝敬捐錢四
百二十千選拔生陳于釐兄弟捐錢壹百千共捌
百二十千業交瓊山縣發商生息爲瓊臺書院膏
火在案茲復有歷年曠課扣存項下除提賞生童
外尚餘八十九千五百文本陞道再捐廉九十千

瓊山縣志

卷三六

六五

五百文仍由該監院交瓊山縣照前發商生息合
計前後所捐共制錢壹千四串按月一分行息每年
將息錢壹百二十文現與瓊臺山長雲 及該監
院韓 公同酌定章程生員加外課十名每名捌
百文童生加外課十名每名四百文共計膏火錢
玖拾陸千文尚餘錢二十四千文作爲師課獎賞
每月三千每課壹千五百文以捌百賞生員前六
名第一名二百文第二名各一百五十文
第四名第五名第六名各一百文以七百文賞童
生前六名第一名一百六十文第二名第三名各
一百二十文第四名第五名第六名各一百文爲

此曉諭永遠遵行毋違此示
院內不許晒米穀豆
麻等件如違送究
道光二十九年二月初二日示

瓊山縣志

卷三十五

六

文會試賓興碑

欽命分巡雷瓊兵備道前署按察使示巡道黃宗漢今將本道捐廉並商同守令籌款爲賓興公項傳集紳士酌議規條勒石示諭永遠遵行

一瓊郡賓興之舉專爲文舉人及拔優貢公車而設別項不得動支

一道光二十八年十月初七日將叁千錢交近郡城當商收領每年一分利生息算至道光三十年會試以後十月初七支息一次以後則三年一支其利上之利概不取離城遠之當商及本錢少者免領

瓊山縣志

卷三十六

六十七

一此項每年所得息將八成與文會試二成與拔貢各按每科人數多少均分

一北閩中式及留京者雖未在本籍起文但經入會場一體給領

一計文會試三年一支外所有二成與拔貢共存錢一百八十千由該監院務送瓊山縣仍發原商領回生息其息錢每三年一算仍歸併十二年拔貢生均分

一何科有優貢

廷試則觀會試人數多少如是科每名會試領錢若干優貢減半

一凡拔優貢只頭一次准領

一此項催收發給歸瓊臺監院管理每會試後由本道札飭該監院於八月間諭知領錢之當舖預備現錢盡十月初七日解交瓊山縣由縣查收一面稟知本道一面移送書院候各會試到院具領每錢一千准抽六文與監院以爲紙張之用俟領完後將何名下何月日具領分別造冊稟報本道查

一凡逢

恩科會試則統計三年之息以年半歸

恩科年半歸正科

一凡會試及拔貢俱以進場爲斷故須俟試後查明

瓊山縣志

卷三十六

六

實係入場者方准給領其有業已領文到京而臨時或選丁憂或迴避親族實因患病不能進場者亦准給領外其餘概不得藉故請領

咸豐四年十月吉日道憲黃

重刊

一凡拔貢有事故未應

廷試將其名下錢額仍存當商俟補試後給領

一凡優貢有本年不入京後補

廷試者當與下屆會試之人統算補試者例得其半

一試後有留京但查確係入場准其父兄弟來領仍取同會試之人具給以防冒混

一優貢已屆六年不補試將所存之項添給與本年

會試者均分其遲至六年後卽補試亦不准支
一寄藉瓊屬之舉人拔優貢如查明實有田廬墳墓
距今在三十年以上者亦一體給領 道光二十
八年十月郡守林鴻年瓊山令劉斯增署樂會縣
劉典臣署瓊府學教授莫瓊林董事紳士瓊臺山
長雲茂琦楊文熙雁峯山長蔡藩邱對勤瓊臺監
院韓煥彝雁峯監院吳雋瓊臺監院王廷傳暨舉
貢生監等全敬立

世德堂記

邱濬

瓊城西郭大姓沈氏其先越之山陰人在宋有諱
翥者仕爲戶部侍郎咸淳中謫官來瓊子孫因居
澤山之龍井村國朝永樂中始遷於條塘之黃瀛
後又遷於壠窩是爲今居侍郎之十五世孫悌所
葺也悌號壠窠居士爲人易直而好義獵涉書史
善議論喜歌詠家饒於貲未嘗凌人傲物雖不孜
孜於學問然其所存所行率多合於理成化壬辰
以舊居卑隘乃改卜於高爽之地旣落成適予曰
翥字子羽號松礪則始來瓊者也十世日顥字清
淑山陰教諭日頤字養正以蔭補將仕郎日興翁

瓊山縣志

卷三

藝文記

七

字復古又自瓊復越五世以下至頤皆塋雪嶼惟
顥與興翁塋黃枋焉十一世諱祐字仲和十三世
諱存性 國初本府儒學訓導生子袞乃居士父
也惟沈氏自宋以來至於居士蓋十有四世而居
瓊則六世矣世世以德相承其爲基也甚厚而固
至居士又能拓而大之培而益之雖功名事業不
逮昔人之顯赫然而貲產之豐規模之遠先業賴
以維持後人得以憑藉繼此以起者安知其無若
松礪翁者之出於其間哉所以然者前人以一德
而嗣其業自茲以往至於千百世之久心非仁不
存事非義不爲處則爲孝子出則爲忠臣本仁義

以相傳衍宗支於悠久何者而非自此德中來耶
予家於居士有世好而伯兄伯清於居士交莫逆
視予昆仲殆所謂異姓兄弟者也予叨官禁林以
文章爲職業凡於天下士夫有所逮作必假筆於
予顧於通家之好獨無一言可乎朝退援筆書此
寓歸付居士子淵源清浩朝夕玩焉且以示其後
之人於無窮

補遺見邱文莊公集卷之十三